

tur *millenariorum* somnia, de regno terreno, ubi pii cum Christo, oppressis impiis, sint regnaturi. Part. IV. p. 421. refutat doctrinam de *fato immutabili*. Nec plane spernenda sunt, quæ P. V. p. 131. *contra Beckerum* affert, inprimis autem laudandum in eo est, quod *mores Christianorum* emendare pro fine habeat autor, & quædam haud incongrua eam ad rem media afferat. Quando autem, quod quidem fere omnibus paginis fit, emendationem vitæ urgere sibi sumit, eam stabilire plerumque conatur ejusmodi dogmatibus, quorum pleraque religionis vere Christianæ fundamenta evertere, & incautos lectores ad separatismum ducere deprehendi.

§. IV. Autor harum epistolarum nomen suum non profitetur, illi autem, qui ipsum oculis suis viderunt, referunt, eum vocari Gichtelium, qui omnes & singulas epistolas diversis temporibus scripserit ad amicos suos, qui etsi non omnes, tamen ex parte Quakerorum doctrinæ vel fautores vel asseclæ fuerint. Duæ partes priores sub initium hujus seculi prima vice lucem viderunt, conf. Part. IV. p. 439. & 441. Accesserunt post mortem auctoris tres posteriores partes anno decimo. De auctoris vita ex epistolis ipsius tantum quædam novimus, quorum fides sit penes autorem. Part. II. p. 203. indicat, se natum esse anno seculi superioris post trigesimum octavo, & patriam habuisse celebrem imperii urbem *Ratisbonam* P. IV. p. 330. Academicæ vitæ curriculum ingressus primam operam, ut ipse scribit, discendis *linguis orientalibus*, alteram ab initio *S. Theologiæ* studiis destinavit;